

四庫全書

集部

欽定四庫全書

經濟文集卷四

元 李士瞻 撰

襍著

題王彥方小傳後

皇帝至正二十有一年秋九月中書省臣奉詔命臣士瞻以戶部尚書使閩中董理鹽賦以進明年夏五月分授官屬治裝戒航卜日將往適會兵亂留城中竟弗果

還因周旋亂兵中間三閱月始得解内外之圍城幸以
全至冬十月遇疾作幾死十一月辱承乏本省左丞俾
專董前事越三年春二月南陽王彥方以南臺都事調
江西僉憲過閩來與予會一見傾寫歡若平生因語及
寇陷吳門時某與今晉寧總管王君仲汚俱陷城中幾
二年誘脅百至終未嘗以一屈丐百死幸天活我今日
得見諸君語畢因嗚咽不自勝後數日僉憲君遣其吏
王允章持承旨張君伸舉為公所撰小傳暨諸公論說

若干篇展誦累日於是益信彥方前日之說真能不降志不辱身毅然以正自持者豈小丈夫鄙陋者所為哉予嘗槩論今之士大夫當平居無事時皆能以道德功業自負謂我處天下一綽綽無難其論古今人長短得失悉如燭照數計貌無尺寸之失橫吐意氣即凌轢諸物直視死無難色人亦多信之者一遇不測臨大難則心喪膽落魂魄俱褫聲嘶嘶若弗續遇賊迫脅則拜伏俛首感謝恐後日夜惟下涎乞煦煦常如刀劍加頸上

臣妾狗馬顧為之而不辭甚者又從而媒說其向尊彼視其君父弗啻如寇仇然將極意而反噬之此豈啻禽畜奴隸若哉嗚呼使其人聞吾彥方之風其不羞而死者幾希矣切惟本朝自立國以來仁義忠孝之道陶濡百年士大夫以名節自立者風滿天下兵興十年餘仗節死義之人固不為少求其生不害於義死無益於事如吾彥方者屈指曾不千百之什一而已間嘗讀史氏傳記三代而下士大夫能以名節自全者多無如兩漢

兩漢名節之士又無如黨錮為最盛黨錮之禍雖因諸君子有激而然然使劉氏得終四百年之運卒曹賊之世而不敢取禪者實滂泰諸賢清議之力也嗚呼清議之不聞也久矣朝廷之上使一日無清議存焉則天下之人將貿貿焉莫知所從矣其何以為國乎或曰王君之不降志辱身固善矣其如不能一死何予獨怪之曰子惡知吾王君哉昔者仲尼稱殷有三仁去者死者為奴者皆得次第而竝論之使管仲必死祇足以成匹夫

之諒其死果足云乎哉由是觀之士大夫不幸而處乎此者惟當顧義理之當否不當計生死之是非若不察夫義理之如何而徒以一死之為快此淺夫亡命無知而妄作者之所為君子無取焉予來閩近兩歲矣凡此之類尤所喜聞而願採者况職忝周爰之列行將歸矣他日以吾彥方之事告諸太史氏云

題濟國張文忠公雲莊卷後

大凡論聖賢君子之出處當觀其心不當觀其跡心苟

是跡或不同不害其為君子心苟非跡雖偶是終不免為
小人濟國文忠公張先生稟天地正大之氣學聖賢正
大之學蘊之而為道義發之而為文章推之而為政事
功業無一而非正大之寓也故徵而為一縣則一縣蒙
其福達而為御史則朝廷賴其尊又大而登省臺秉鈞
贊化執政事之柄則治理以之而綱維况其胷次開朗
志慮公忠其見之設施注措者宜乎其井然有條而弗
紊若先生者果何如人乎夫當至治間英皇好以剛

銳神武御下羣臣一忤旨禍且弗測在朝無小大皆側足度日適有建造燈山事者其勢方峻先生獨不避鼎鑊抗章極諫宰臣大人皆以為危先生則處之裕如也故章疏一上卒能回天之力霽雷霆之怒而事賴以寢至是人始大服先生之忠義先生之量將周召而伊傅之先生則棄官長去堅卧雲庄之谷日相忘於山水間遨遊詠歌若將終身焉吁何其輕去就急恬退無一毫係累如此哉蓋其中心之燭理明慮事遠不如此他日

必將有攫龍鱗以犯人主之怒者復求如今日得乎夫
人臣不能炳幾先作卒使人主有一旦誤殺直臣之名
焉不幾於賣直以要人之譽乎其心盖即孔子去魯之
意也先生之於君可謂忠愛之篤矣豈真在乎山水之
間耶人知累詔不起以為先生高余則謂先生之用心
蓋有不獲已焉者故大厯之間既有西臺中丞之詔時
陝西大旱已五年矣民饑瘦死者不可枚舉先生一聞
命即惄然就道了無難色既至乃大發食賑饑救禱百

全汲汲焉若不足且捐已之財以濟不及日夜仰天號泣憂勞成疾而卒以死先生之於民可謂憂慮之過矣夫豈真有過高絕俗之事耶嗚呼人欲求聖賢君子之用心觀於先生斯可已欲求先生之用心觀於先生之出處斯可已余來閩解后其子江東僉憲引示余雲庄記暨諸公之說得備考其本末之詳因題諸公卷後

題跋吳溥泉所藏哈瑪爾丞相書贈尚友二大字

廉貞丞相未當國之先嘗侍宿衛最號親近然已與士

大夫相往來日親翰墨一旦秉鈞持衡即專精治道求
賢審官躬吐握之勤訖無虛日此書蓋丞相未當國之
前書也筆法蒼古意態藹然溥泉郎中受知丞相最稔
故為書尚友二字以畀之尚志不足而尚友夫古之人
焉吁丞相期公之意遠矣哉

題安慶余闢廷心左丞死節說

唐經安史之亂天下死事之臣固不為無人焉然求其
能為國家憂深思遠不苟以死為快者惟張巡許遠為

然耳當時二人同守睢陽以死自誓需四方援兵以圖後舉者誠以睢陽為江淮保障脫無睢陽是無江淮也此其忠君愛國之意奚啻青天白日若哉本朝自邇時盜賊蜂起兵連禍結十有餘年而謀國馭兵之人率皆昧於形勝不能先事預圖是致竊據土崩之勢不數年而成余公廷心以名卿碩儒朝廷奪之哀而俾鎮安慶公亦以國家多難寧釋親之喪毅然一起以從君上之命到鎮之日凡可以保城池佑兆姓以捍賊寇者無不

殫智力而樂為之日與軍士庶民相親睦一如父子而人亦甘為之用故公死之日帳中一時士大夫無苟安以向賊者蓋公之用心亦如巡遠之保睢陽誠謂安慶實當九江之保障若失茲郡是失江右也公之設心處慮又豈盡出巡遠之下也哉由是觀之忠臣志士當茲紛糾之際屹然如中流砥柱真足以回頽波而障狂瀾不然將滔滔不已祇見其淪胥以亡耳嗚呼巡遠死責在進明廷心死將責何人乎予以晚進且適當治裝之

促恨不得為公不一而書之因觀道夫說及泰父序漫識於後臨楮感激不覺潸然

題閩憲僉索克濟政續卷

福建隸八郡汀為最遠且僻我朝仁政之被猶負固時不率教部使者或一年不能一至比因四方多壘土寇曹柳順遂竊據以叛迄今十餘年諸屬縣邑悉為逆境若汀人陳君有定負忠貞果敢之氣崛起草莽首提義旅以從征討誓不與賊曹俱生於是保民勵卒阤其要

害卒能擒賊以奠厥土時至正二十二年壬寅也初閩
海僉憲索君克濟嘗嘉其勞又以其地初當親歷率其
曹屬躬造其壘面加勞勉以其所罰金五百兩為犒師
之費陳之部佐無小大皆感激思奮故卒成陳君平汀
之功嗚呼天下當多難之時豪傑之士其忠君親上之
意出於秉彝好德之素若固無待於勸獎而後能然其
任風紀之司者舍是道何以哉雖然使為將校者人人
能如陳君之向義盜賊奚有不平哉而職司風紀者亦

人人能如索君之躬任其責烏有將校之士不思感激立功樹勲以報國家者哉彼其逡巡畏縮不啻如首鼠之遇人或視國家之事一如秦人視越人之肥瘠漫不知省者果何如人哉予適持節以使事至閩目擊其善政故樂為之書并為將來者勸

跋福州儒學提舉陳景忠所藏東坡公焰太師墨帖坡翁以文章氣節高步一時而書法之妙當時無能盡識之者獨山谷老人謂其結束幽雅意態高妙如山人

處士灑然有出塵之想雖武夫暴客遇之亦當歛衽加敬視魏晉隋唐之善書者殆未易以優劣論也今觀此帖迺知山谷此言是謂得夫三昧而具金剛眼者下此則辟利果爾嗚呼今距坡翁近四百餘年恨不得一望其顏彩而僅獲睹其手澤之存尚惜其止于百之一二而公照此帖風神俊逸迥超尋常之見而為吾陳君忠收之又安得不作君家之珍玩哉夫景忠博學宗匠文高乎衆人而不得盡白於當時將如坡翁之書他日

必有能識之者景忠尚未老必能有待三復此帖為之
永慨

跋傳西軒托克托大師所贈宣文閣本智永千文臨
本卷

今上皇帝視政之初即燕寢之左開宣文閣日延學士
大夫臣其中讀書講道緝熙聖學精求治理游息之暇
尤好近翰墨日必命儒臣之善於書者摘取秘府所藏
古今圖書及歷代名人法書時賜評題自是宸章大進

雖晉唐人善者有所不逮一日取隋僧智永千文墨蹟一本上自臨摹久之遂命崇文太監至浙西命太常臣周伯琦摹勒于石寘之閣內謂之閣本千文每有所賜即於搨本識宣文閣寶其上而先太師丞相臣托克托首獲與焉臨川傅君允中以布衣抱藝京師受知丞相最稔他日允中辭歸丞相出此以贈嗚呼當宣文侍直之時載筆供職之臣非無其人焉乃獨命臣伯琦而摹之其眷顧之意至矣當丞相持國枋時羨官珠玉之資非

不可以富貴之焉迺獨取此以為贈其嘉惠之念厚矣
今兵興十年餘當時侍從之臣或相繼而逝或身陷賊
庭與大夫士之辱在方鎮及避跡江海者又比比不能
無焉嗚呼亦嘗有不忘我主上之恩者乎亦嘗有念及
先太師之意者乎

王仲弘卷

至正二十一年秋七月余承乏地官尚書叨奉明命以
航萬里海督閩中鹽賦以輸朝廷來自其年七月至則

十一月十日也始至則即督省府戒合屬大選官曹分
局隸事明示賞罰嚴立考課成算既授峻命有程日久
自給書禮播諭藩方遣行人以布德意暇日凡官府之
賓客與夫南北大夫士之往來干謁者並得進延于庭
訪究得失由始至距今年三月已五閱月其所與接欵
而交談者不知其幾何人矣有所謂王生仲弘者足不
履於公府之門言不接於左右之耳一日或有持生手
卷請予文視之則生嘗以儒生士子隱業於裝潢弗苟

焉以食者也今若諸公之論則知生之為人非古之所謂伐檀君子之流歟甘隱賤藝為之不耻又非古之所謂伶官賢者之儔歟具是二者賢於庸人遠甚余既羨生之為人而又嘉汀生晃之善於其喻故即其事而為之說

貢泰甫詩跋

貢泰甫先生以文章政事追蹤先輩當先生歟歷中朝間搢紳之士識與不識皆知其抱經濟而為國家大用

也十年前走落京師時知先生之名最久自以屬在
下僚無暴名顯於士大夫間徒負龐豪倔強之氣不肯
往就一見脫若見時又恐待以衆人則沒身不能雪恥
癸巳科走也例以在官得授藝南城適先生典文衡院
中發狂有難犯之勢竟迕公議斥走弗省自是益不
敢託執事者為先客去年冬走叨使來閩中乃得日奉
言笑即其論議之諄諄顏色之溫溫從容慷慨若金石
相宣山谷相應無絲毫之造飾信乎其為大人君子也

所謂狎愛敬畏欲舍之而不可得者於是覺前時負氣
而弗肯就見者追悔媿恨已無及矣今觀先生晨起夜
坐二詩若庾信所謂珠玉在側覺我形穢醜婦效毛嬌西
子之顰殆難取媚矣敬疏短跋姑贅卷末

跋張子固都司詩軸後

走與子固忝同鄉井計十年前子固為郎中書時已嶧
嶧樹頭角於衆人之表予今偶寄海嶠忽覩此軸此贈
益信其為人矣噫人生功名尤在晚節太平伊邇耆英


之會尚期未晚不知子固以為然否

跋關西楊煥然先生畫像贊

煥然先生當國初時文章道德為第一流人物柳塘歸隱乃其素志詎易以片言為先生增重哉世之人乃或誣以晚節托求神仙虛誕之談其亦誤矣今覩其孫益知其祖噫源深流長本固末茂良有以哉

欽定四庫全書

卷四



經濟文集卷四

欽定四庫全書

集部

經濟文集卷六五

詳校官編修臣翟槐

中書臣劉源溥覆勘

總校官編修臣王燕緒

校對官學正臣翁樹棠

謄錄監生臣王露

欽定四庫全書

經濟文集卷五

元 李士瞻 撰

記

福建憲司題名記

國家之有憲臺猶天之有斗斗為天之喉舌所以幹
元氣平四時而成歲功也憲臺為天子耳目所以廣聰
明旌淑惠以清政本也洪惟我世祖皇帝文謨武烈奄

造區夏立綱陳紀九有攸同於是天下立御史臺三風
紀之司二十有二而福建閩海道其一也道有長有副
有佐及賓屬之置員各有差綱維之意至矣閩海去朝
廷幾萬里其土風之澆厖山川之險惡海醞市舶之所
集官殘吏蠹膠固彌深加以連年兵興道路修梗強梁
跋扈之人依勢而敗度者又比比聖天子宵旰懷憂無
遠弗届思得剛方端亮之臣為斯道之長既而廉訪使
恩寧普君以累任憲臺由本省右丞首膺是選增秩有

加制下之日遠近竦慶憲司舊有題名記二滿不可復紀恩君謀諸僚佐請更文諸別石予惟公署題名蓋欲其彰既往詔方來俾人得指而議之為勸戒之助至公也吁可不慎哉

露布

平山東露布

中書分兵部蓋聞帝王之歷數在天妄干者自戮國家之版圖極地竊據者必還揆理勢則當然徵事情則允

驗我太祖皇帝剪夷玄漠肇造丕基我世祖皇帝包括
夷夏繢成大業文物涵於九有政聲被於八垂雕題鑿
齒之首駿奔銜璧椎髮勞膚之長躬走奉琛曜緯含彩
而宣祥峙融孕珍而發媚百工凝其懋績兆姓合其厖
風更睿哲之迭興致雍熙之累暢迄乎聖上臨宇道德
益昌重乎英儲體元馨烈彌盛規模卓越往懿制作兼
備前徽惠渥而貢賦屢蠲教隆而刑罰幾措夫承泰則
否變抑反治則亂生斯虞后弗過於苗征故夏君用脩

於扈伐粵惟汝穎實開倡厲之階誕眷江淮俄蔓聚逋
之藪毒焰轉熏夏妖鋒旁靡幽荒韓駢出蟠族辱孤
誘尸雜醜劉禿起狗屠惡少欺率羣愚憑阻我城隍蹂
躡我疆場華宮蕩於焚燼鉅府傾於剽資父兄之膏髓
濡矛子弟之肝腸薦鼎彝倫顛錯善法斁隳忠襄獻武
王夙挺雄材素韜偉畧義旗始奠里閭之豪傑雲從威
鉞載揚海嶽之拳翹雨附振銛利於許甸奮勁健於雒
畿闔虎牢而掃溫懷超鷄阜而披挾孺卷彭衙之浩漫

刮太華之層氛周岐偃旆霄撞秦時回戈夕擣移屯細
柳縱獵長楊靖函失險於建瓴幽隴復平於鋪砥摧効
姦于狐嶺永乂晉區掩餘孽於鴈門遙寧代域偏師度
遼而襲潰特介逾汚而受降翻陳蔡之舊封板梁宋之
都邑猾堅僅遁疲氓獲存三河之烽火既休五原之羽
書亦絕遂分留以西撫爰大舉以東征將匝絳壇列緹
綃之千幙士循黃道聯氍毹之萬營僚佐盡簡奇髦賓
舍咸標雋彥旌旂蔽於白日棘戚摩於丹霄鞬犧碨碨

乎狡貌韜軻嶙峋乎獮豸連躍湛盧之劍柘號繁弱之
弓粟庾山驅芻奮林動指嵩邙而直赴涉灑澗而斜趨
珠犀照井陁之輝鉄馬刷邯鄲之影樓船斷孟津電激
屋車亘牧野雷喧嚴刁斗於鄴丘震鉦鼙於湛苑秉麾
申號獻冠之囊牘已來坐握沈機納捷之蠟章尋至環
轍挹鹽溝之月浮梁貫滑浦之虹迎麌于河流血漂杵
遂背于汝積尸隱于兌魁膽龔而奉鄆求盟犧類膝行
而歸詳代贊祓周公衣冠之廟汎孔文絲竹之堂薄鳬

繹以探收徇蒙龜以掩取駐驛冥覽窺岱頂之金泥解
胄雅歌考泗濱之石磬飲溜而鼈鼈莫咋乘皓而獮猶
奚跳鈎陳袞組於沫南攬槍黯淪於歷下緝鄒鄭膝薛
之境踐苔墨膠萊之墟放於瑯琊臺望鰲嶼以弭節登
乎興愚觀挽鵬池以洗兵獨視清藩最居洪鎮九雉因
於神力五龍賴於化工點負固而為巢狡藏深而作窟
本非窮蹟示寬伐以昭綏終罔改悛決亟嬰以困迫壁
凌烟而綦布柵拂漢而箕張或肖像於魚麗或倣形於

隼伏伊降師之間處肆邪黨之內通其田豐王士誠者
性獸則豨行禽則獍詐竭而興謀力屈而繫纓待之無
異股肱倚之則同心膂班以尊爵假以要權翁媼有推
恩之榮妻孥有覃澤之慶玉帛充物寶羞厭殘豈期愛
狹感銷孰慮防疎難入茲先王委躬社稷彼逆冠竄命
岩墉邦殞孫吳切宸衷之悼惜戶殤曾閔榮慈念之悲
牽折圭共弔於迂東帶交唁於位七萃若捐其父鞠四
恒如釋其母依比廬之織機轂鳴達巷則春杵停和貿

墟俱寂吹空並寒覩江右而增嗟猶巴蜀之思葛相過
峴碑而墮淚其襄樊之慕羊侯優綸音以獎崇殊典章
以褒顯陟之以政宰疏之以勳王篤其祚於土田綿其
祀於廟貌賚豐遺孝賞裕後昆總兵官光祿大夫中書
平章政事兼知河南山東等處行樞密院事皇太子同
知詹事嘉猷發敷令譽又著搢紳之所欽嚮部曲之所
樂從以嫡以賢乃侶乃續含哀受賜墨縗之憤曷舒雪
恥撫戎素縞之勇自倍殮宿叛而陸川皆赭殄滋蔓而郡

邑咸清行碩畫以謀攻藉銳芒以誓冠植板梯於亭毒
仰接遊鳶懸樓櫓於杳冥俯瞻行蟻衡輞逸濠而撼觸
飛棧排陴而騰躋轟礮石以靡堅簇藜笞以蹶猛逆矢
攢而棲蜎奔旗穆以翳山氣蒸而霾霧鬱盤謠闌而乾
坤搖盪十面合而復垣裂八陣衡而叢閑掀殲馘者草
芟殲仆者麻卧震電之滅小堞驚飈之散輕塵縛二憝
於廣厔累諸渠於徽竇究宗畢執稚屬全俘衆烏設於
黼惟豆籩羅於瑤席式慰攸恚用告厥成初膾判其童

孩次脹斲其婦女田豐王士誠剝心以侑祭醢肉以分
餐傳首藁街暴骨高塋其馮陳楊李等或竿磔於市或
轆送於京全齊由是而削平鄒魯由是而鑿定方將淬
礪劙鍔勦僭偽之根且復搜索瑩瑕除狂惑之蔓強梁
瀆紀之輩跋扈犯關之徒母怒蛙膺敢擎塘臂悉宜播
誠威使知懲謹露布上聞

讚

濱國張文忠公贊

山川孕靈篤生名賢志氣開朗秉心塞淵金玉其相肫
肫其仁愷悌君子粒我凡人

楚國程文憲公先生畫像續贊

仰先生之儀彩粹然有君子之德容覩先生之衣冠藹
然有三代之遺風是蓋當國家草昧之際天必生碩德
之賢為之經綸而彌縫之不然幾何其能混一九有而
建不拔之業於無窮者乎顧荊州為余父母之邦實自
古豪傑之所產而先生適崛然生乎其中其所以鍾山

川之英靈全扶輿之淑氣是非希世之逢誠為曠代之
豪雄歟宜乎其一時明良之相與蔚乎若雲龍風虎之
相從也惟不肖瞻之與先生也世之相後百有餘穢地
之相去百有餘里前雖不得攀奉顏彩一聆罄欵之益
後乃得與其孫世京忝斯文契之美噫雖不幸猶幸也
悲夫

詞

海上祈風投詞

伏以慾海波深惟藉慈航之渡胥濤勢險用叨陰相之
功敬叩玄闕特陳虔懇念某等烟波羈旅螻蟻微生
罪獲於天爰自平生而積情出非已多因有故而來
項緣國步之疎遠遂致民黎之播越或情牽於骨肉而痛
切於父兄或志迫於饑寒而賢勞於王事迹偶同於首
鼠念豈比於禿鷺類由公事而私還類值寒來而暑往
皇華之使每懷靡盞之悲式微之歌恒起遄歸之念情
該萬狀話匪一端恭惟天妃夙契道緣悟超仙品體太

上好生之德普濟生靈仗佛光真乘之威同扶社稷名
既登於祀典功久冠於皇家重念某等偶因公委一行
公私人衆參隨下官顧搭溫州楚門戴某大亨船隻前
往福建已經取自十月初旬登舟放洋不圖行次中途
日值逆風橫作既波濤之洶湧即衆意之愴惶浩乎莫
之茫若無措水薪殆盡軀命是關何一葦之艇未航而
八閩之州安在人情伊阻王程孔艱言念及斯痛傷何
既伏願神慄順指風馭迴翔海上靈槎冀即登於彼岸

天心明月幸普照於迷途

謝風投詞

伏以一葦之航事已付於僥倖中流之瓠恩斯倍於生成天寶相之人胡謂也言念某等孱孱弱質擾擾浮生行藏固出於有因形迹頗同於亡命疾痛而呼父母至性難逃利害而切肌膚衷情所在飄飄乎風濤是苦惱焉淪胥以亡望洋而退者再三垂涕而告者數四如是玄冥布德炎颶斂威風馭整而迴鑣雲帆張而順指

一時有慶萬變胥停化逆浪為亨衢起呻吟為言笑是
蓋神妃默贊衆聖周旋首露投忱敬伸虔謝

經濟文集卷五

欽定四庫全書

經濟文集卷六

元 李士瞻 撰

詩

為福建監憲恩德卿作

寶章美皇太子也太子聰明天授銳志聖學皇帝為開端本堂以教太子太子自與師保之臣講誦不輟性雅好翰墨內有所蘊外筆之書然

每書輒寓懲勸以賜近臣福建府省右丞恩寧
普君以西夏名族歟歷中外聲光赫然太子為
書文行忠信為善最樂八字以褒寵之筆勢飛
動氣象森然大夫美之而作是詩也

倬彼雲漢為章于天相彼寶章昭回于編如龍斯升如
鳳斯騫如泰山斯重如北斗斯懸 泰山維何巖巖高
矣北斗維何奎璧交矣繩彼結繩心焉忉忉旣彼科斗
不可以叡何以似之禹疇羲爻 于洛有書于河有圖

聖人則之人文誕敷于古有訓世有格言格言孔嘉垂
裕後昆於昭元子岐嶷夙成羣后在天克配于京終始
典學緝光明帝曰元子毋怠毋盈元子有命咨爾墨卿
乃召褚生乃召管城徵彼處士進彼陶泓執事有恪邇
觀厥成於皇尼父載宣四教文行是先忠信是蹈
曰維為善處身之網誰其樂之東平王蒼彼臧克臧
俾也孔昌彼狂弗莊俾也斯亡嗟爾恩卿永保全名
允矣君子展也大成恩拜稽首對揚洪休君子萬年永

錫爾猷

寶章十章五章章八句五章章四句

五言古詩

五更述事

北風撼船頭終夜苦難寐暫寐遽驚覺何如不成睡凌
晨欲交睛喧譁復驚悸問之見山來謂是溫州際楚門
舟人家檣帆與心繫誰無遄歸念况乃此輩類我心重
賢勞所思在王事造物豈偏顧悉願委以遂寒暑尚有

差神明苦難是

翟甥以詩見呈情意甚至但辭不足以發之老夫
漫為改定以成其愛慕之志

我有渭陽思隨之使南陲當茲風濤中或受霜露欺鬢
髮近衰老朝夕誰與宜吾生自弱齡已有怙恃悲傍無
期功親賴有舅氏依孤苦無與比況負駕鈍姿過庭日
諄諄令我學書詩書詩弗終業猖狂走東西值此年歲
艱所願良多違晨昏每深省但覺慄以悽有弟天一方

生死未易期歲月各以逝徒生竟何為舅恩等劬勞形
影恒弔之何時遂榮名報此三春暉

楚門述懷

我昔放船日乃在孟冬初此時風寒競雨雪紛載塗是
行死生別妻子不得俱江南地偏下况復在海隅嚴冬
如初秋天氣恒多殊草木未搖落布褐被體膚綱工此
邦人室家念居諸繫舟楚門灣一住十日餘我心如鋒
攢從行念踟躕雖沫主家顧志願良未舒情雖公私牽

輕重亦異趨君家素忠義所望同吾徒王程已愆期日
夜畏簡書苟重君父憂內省還何如願君竟茲意早發
勿趨趨

將發楚門

使臣當何如所司在周詢哲王重觀察民情苦難伸我
從天上来乘桴赴南閩艤舟楚門岸奄忽踰一旬此邦
俯要衝道路當海濱民力困兼併徵求盡鷄豚浙東惟
七州地狹民亦貧所憑舟楫利生理恒艱辛視之等道

醢雄吞竟何人我於十日來有耳不願聞盡從方門至
使者如魚鱗舟車日旁午釣符星流奔故令惡少徒什
伍恒成羣白晝肆攘敘漁獵據通津充噲噬可炙人命
同輕塵內君命尤嚴所在毋敢論昔有五侯宅今有五
府門五府皆貴公擬跡王侯鄰紂朱曳組綬富及子與
孫聖恩與鴻濛無物與比倫乃復為五虎噬人如羶葷
五侯昔何如誅夷到荄根以今鑒往者傷哉竟難陳

吾觀桔槔論

吾觀桔槔論力鮮功倍鈞如何端木氏乃見汲者嗔哲
王肇先基辛苦貽子孫聖人貴萬全小利曷足云彌彼
愴人徒啓此僥倖門海艘歲萬漕便利母與倫至令百
餘年不復事討論遂使奸雄徒窺測見本根炎方多長
蛇時效猛虎蹲兵交十年來氣運固有因聖人尚色荒
政令務因循乃知堯舜理乾綱是寬仁昔嘗賦車攻會
同如星奔仰觀千載前誰能繼先塵嵩靈誕嘉祥降此
甫與申方叔及召虎聖人周宣君中興眉睫間河岳亦

精神我皇以武姿哀痛怛下陳茂哉垂九葉度建萬國
春竄伏恐已逸安能覩乾坤執筆等太史磨崖勒雄文

十一月初二日發楚門

疾風西北來解舟楚門灣開襟欲忘言喜折兩袖彎朝
辭戴氏子暮見鴈蕩山此山接天台一見開我顏蒼松
襍翠篠宛似瀟湘間風潮催輕帆不得聽潺潺亦有王
事牽二毛近成斑幼讀天台賦當時願躋攀斯遊誠至
幸欲往又復難凡骨恨未蛻何時脫籠樊長嘯謝雲巔

晤言期後還

過鴈蕩山東行程一舍許名歷澳島無風而雨氣
蒸如暑眠不帖席留此三日不得行時蓋十一月
初也

百粵居炎荒遠在揚州域氣蒸恒無風三冬如六月地
卑雲霧饒海闊天常濕積陰久不舒微雨紛更集日為
王事牽中心疚如灼夜瞻北辰高勢遠不易即安得如
飛鴻那能暫停息

題員外柏君壽字卷

柏生稟元化託地臨廣阿下有百尺根上有千丈蘿虬
枝刷風雨蓊葱漲雲波不受霜雪欺勁節森有那鬱然
梁棟鼯明堂起差峩丘氏苟見用之死矢靡他諒彼君
子徒小大同一科丈夫貴晚撫百瑤如雲和貞心倘不
改天壽當奈何

五言律詩

贈貢泰甫先生牙笏詩并序

牙笏一張長勁且闊古所謂記事之笏也聊為
從者之贈詩以志懷不勝增感

象簡霜凝重蒼鬢雪色新轉輸勞算用報答費經綸扶
病朝明主臨軒問老臣此時江海上人已厭風塵

長短句

題鄭彥昭郎中為溥泉所作梅竹

山中人寫梅竹琅玕清瘦花如玉幕中坐客多才華鎮
日揮毫寄幽獨窓間月底忽相逢紙帳香飄雲滿屋

五府少年釣馬歌

南客南歸必買馬
冀北馬羣最多者
白銀星聚賤如塵
千金買得那論價
龍媒之駒鍾駿骨
矯如驚鴻蹄切玉
神物本是房駟精
一夕分輝耀南陸
有時踣蹠忽長鳴
乾龍坤孔各有靈
世人賤材但貴貨
縱有眼顧誰終青
一從上船當船頭
百計管束如拘囚
仰首向天俛首地
馬與天地皆蜉蝣
乾坤再造須清寧
豈獨人人望有生
當時舊將封侯尚
未老何為馬也不得
逢中興唐時奚

官善養馬南人養馬尤間雅千方調飼如擾龍生芻細
莖那盈把浪濤風捲狂欲顛船頭入井尾刺天前僵後
躡戰欲死一生九死無因全當時人命尚弗保已拚不
得終前好五更風定強起看幸爾未盡同枯槁所存祇
是骨與毛首纔伏櫪神俱逝主人熟視但嘆息雖有善
相無方臯海陬去天經萬里海洋風波仍萬死脫生免
死幸已難豈意江南猶未已中原豺虎年固多浙東五
虎將奈何船頭忽驚來刷馬惡少三五羣相邇半紙鈞

帖印一顆一日三番急星火問之便稱方大人大人有
命尤難些紅纓氈帽青辮絲短衣衲祫双環刀便將長
繩選馬釣喧呼叱咤聲狂嘈馬亦垂頭若有訴主人錯
愕不敢顧但將白金告少年再三買得寧償負陸有官
穿水有漁剥股豈特臻肌膚魚蝦鷄犬悉有命饗饗至
此那能居我元天子家六合聖子神孫政綿邈三苗洞
庭將有歸涿鹿蚩尤終受縛君不見蔡州吳元濟根盤
蒂固能幾世又不見汴州李希烈桀驁偃蹇旋覆滅人

生忠義是善媒黃金北斗將焉為吁嗟鼠輩誠何癡

責風伯

吾聞六卿之官天子吏天之四時同一揆天上五命各有司一或干之比僭擬孟冬初來將兩旬玄冥行天祝融死日張土囊公怒號風伯為朋海若曹人言南風多不競是何於我相魚然排山之浪如銀闕打我船頭行不得鷗首驚飛莫敢前鷗夷鼓吻常噴噴船頭呻吟船尾病此去東夷垂欲近未聞今日薪水貴如金當年五

百童男一去無音信一時聞者皆快然便欲騎鯨飛上天但恐爾輩是凡骨天高路遠難攀緣天子命我使國土職方禹貢尤修阻爾聞天子遣使來神胡為乎弗相與使者觀風古有命未聞遍到天之涯是行恐是上帝意欲令八荒四海知屬天王家昨宵夢覩玉皇勅下檄五丁追退鷗即今天子聖且仁爾為風伯何不為臣敢為逆北陰之府是酆都不比人間官府但糲糊盡將厲鬼磔裂為萬塊雖有口耳空挪揄尚書有云不逢上帝

怒汝若有常送使者到閩去去天萬里閩最遙閩人日
望使者輶爾其欽承厥命勿有替我將領子明年俱來
朝慎莫效尤國鵠巢

壞舵歌

南溟之魚頭尾黑身長竟船頭佢鐵浮游偃蹇氣欲吞
斜日昏冥暎鬚鬢煦沫成烟浪花起逐我船頭趁船尾
恐是昔年未死之孽龍一經譴斥偕厲鬼舟中健兒恨
盡白鸞弓擬之三復止明日疾飈驅長雲巨颿高張萬

馬奔舟卒思家窮力使瞬息千里若不聞捩舵逆指衝
怒濤歛如生馬當春驕又如驚殷且上千雲霄萬里一
息非為遙須臾有聲如裂帛三百餘人同失色鐵梨之
木世莫比今作舵根為水噉是木之產非雷同來自桂
林日本東當時不惜千金置便欲雲仍傳勿替箕裘相
紹近百年旣已墮矣奚容言眼前生死尚未保惟有號
泣呼蒼天蒼天高高若不聞稽顙齊念天妃神我知天
命固有定以誠感神豈無因少時風馴浪亦止以舵易

舵得不死我今幸爾同更生開闢以來無此比女媧氏
天妃神補天護國相等倫世代雖異功則均我皇開國
同乾坤一年四百萬斛運麾叱雷電役五丁片艘粒米
皆風汎財成本是神之功直與天地傳無窮愧無如椽
五色筆磨崖刻頌驚愚蒙

題鄭靜思松琴得趣圖

南臺御史大夫道隱公為天台鄭靜思書松琴
得趣四字求予賦詩倚舟書此為再會之好云

鄭靜思永霜姿松琴得趣知者稀臺端道隱酷相愛大
書不一特畀之懸崖之松怪若畫風雷為長虬龍枝盤
錯屈鐵刷霄漢迴旋造化通天機泠泠清響孰與調幢
幢翠葆相參差有時山人坐其下靜聽但覺宮商隨夜
半起看河漢落虎豹俛首蛟蜃癡黃鍾太音世何有萬古
惟許庖犧知虞姚作五弦南薰鼓雍熙巍巍之德配天
地垂裳端拱成無為伯牙是何人尚俱不得鍾子期迺
知物理自有無言之至妙追作矯飾真成非鄭靜思人

汝奇當今聖人是堯舜臣下況復多臯夔君臣相擇各
有以得趣政在弦聲遺致身忠義苦未早人不汝念君
其思古來賢達賤苟且出處幸勿負此清明時

題平陽彭氏雲松亭

彭孝子情何悲中心一念人誰知白日思親中夜隨夢
中猶欲笞其兒兒啼不勝親抱之遠爾一見尋別離覺
後但覺心歎歎心歎歎亦何有朝見鵬山之雲自往來
暮見梅原之松鬱巍巍從問爾山中雲恐親心所怡又

復爾雲中松恐是吾親手自移今雖不見吾親顏色幸
得覩此為我永慕之容媒松常青青雲楚楚雲不能言
兮松不能語彭孝子有衣弗君著有杯弗君舉見君之
容聞君之音心已苦相蓮亭上暮即歸歸來惟有睡與
癡彭孝子忠心一念人誰知

贈南臺察院椽修敬宗管叔堅還臺

東風吹雨春冥冥荔子花殘梅子青遊絲千尺遍江濱
愁望離人留不住三山中有神仙宅玉樹亭亭照顏色

去年相逢眼未知今日相看重離別脩郎修郎多汝賢
曾陪驄馬驥後先氣岸嶢嶢隔秋水皎如寶鏡懸青天
突竅洞射幽隱闢毫末悉露生光妍駿如天馬行長空
天矯弗與凡骨同快如俊鶻下曠野搏擊狡兔追莽風
近時上書于主將意氣橫出衝晴虹黃金臺前馬價高
舊時屬椽俱英豪如公脫落定應少我有真眼過方皋
邂逅天涯即傾倒北方之人信然好紅顏綠髮當妙年
頑而長兮富文藻明月之扇子所遺上有名字誰其題

似欲南薰送北客贈之寄爾長相思故人新峩獮男冠
神完氣固方大觀神仙中人託為侶彩鷁西去何翩翩
我今贈子青雲裾旋當與子催薦書中臺選曹定虛左
不負堂堂八尺軀

七言律詩

送泰甫貢先生還朝便先往浙東訪妻子

聖主中興憶舊臣白頭自分老無聞傷心轉在朝天日
經亂維存報主身去國十年渾似夢到家一飯忍忘君

太平政爾煩經濟宣室非干問鬼神

風雨瀟瀟鷄亂呼使君無奈賦歸歟草玄易覓揚雄宅
到寺難求太史書白髮詞臣還祕省紫苞威鳳耀雲裾
會看同住京華日退食時時一起予

贈戴氏詩

永嘉名郡多名族孝義忠貞戴氏家曾向轅門干上將
甘從虎穴試磨牙蘭孫比玉香凝砌棣萼聯輝樹有華
意氣每逢天上使年年來此憇星槎

十月十八日喜風順而作

心緘未上神先啓風馬神輿瞬息迴似向藍闌逢驛使
直從閬苑去天台潮寬新水毋煩算路入閻州不用裁
金石相孚應未與會將功德報燕臺

始余發京師時已聞河南平章公克復濟南渠魁
就擒計益都之寇可不煩餘力而下矣夫大將係
國家安危行當慎重為宗社計舟中有懷援筆為
賦是又不能不留情也大將名察罕特穆爾字廷

瑞云

久聞大將下山東一戰名成破竹中調度敢煩廊廟計
疇咨仍藉相臣功宣光接武揚先烈方虎聯勲振古風
宗社有靈須慎重母勞親手定雌雄

十月十八日夜睡間紀事并懷尚書微爾托里張自
南侍郎呂伯益韓汝舟皆一時煙波羈旅之人也
明年相會遂得抵掌一笑

紀事

風送輕帆浪送船神遊萬里水中天魚龍吹雨三更後
星月憐人午夜前夢涉關山猶惴惴起看煙水尚綿綿
賢勞詎敢言王事虎穴頻探已數年

懷徹爾托里

同日除書下九天可堪同事更同肩延春閣底謀初畫
海子橋頭轡每聯酒戒飽聞微醉後言箴猶在別時邊
細思忠告如君少滄海平安幾日傳

懷張自南

每當同拜仍同事何獨君今使秣陵寇折底煩韓吏部
作書那數李陽冰新詩我謂參軍比短貌人呼主簿朋
試看明年降虜策定期六月見南鵬

懷呂伯益

誰着麻衣過七閩秋曹老子念先親登舟但抱終天恨
引海方知未了身世亂備經千百痛慈顏不見十三春
白頭扶杖衡廬下徙倚風前泪滿巾

懷趙虛舟

夙昔聞名未識君識君纔得兩三旬一時同拜叨前列
此日追陪愧後塵欵欵謀猷臻事變雍雍言笑見情真
明年檣艦浮杯簇方信韓郎是偉人

抵楚門即船主戴廷芳廷玉家也

楚門山色散煙霞人到江南識永嘉半隴石田都種麥
一冬園樹尚開花海天日暖魚堪釣潮浦船回酒可賒
傍水人家無十室尤憑舟楫作生涯

又

船泊江潮是異鄉戴郎家住楚門傍寄來青柿猶存蒂
摘得黃柑盡帶霜竹塢人家茅屋小石磯漁艇釣絲長
可憐擾擾風塵際誰識桃源有洞房

次楚門聞福州六月之變就簡倪仲凱郎中不候而去
誤聞消息心如灼歸興那能候我來不是尚書船到晚
却緣員外別初回閩州烽火人猶記回紇刀牌孰總裁
最恨當時謀未審至今遺禍使人哀

前過台州代州人董生安車秀才而作石橋州之

所有勝跡也

天台山水妙南州是我垂髫舊所遊亂後久拚門戶改
別時只為稻粱謀石橋雨沒苔紋滑宰木風高鳥雀愁
欲上磯頭聊問訊片帆飛過不知收

走也啣命而來艤舟永嘉之楚門蓋居人戴氏里
也一日邀致於所居之村曰竹岡杯酒留連伯仲
聯侍居周匝佳山水環遶於其間間嘗游目登眺
一時清遠之思斬然眉睫昔謝太傅好遊東山未

為無謂也顧余何人擬跡宰相不能不愧耳幸以
詩人常談見恕是所望也

鴈蕩山東是竹岡林泉清賞勝滄浪人家散處通潮浦
鷄犬成村自鴈行無數小舟灣柳外映山紅樹繞溪傍
主人惠我遊山屐謝傅情濃樂未央

黑水洋為風浪所飄見倭國界山船間雖有所賦
成於一時苟簡殊未工也阻風之暇復次所懷再

書船之左

極海風波不易模孤臣去國遠天隅東臨倭子將非類
西脫泰山即異區鵬鳥昔來凶已告界山今遇死無殊
男兒許國誠何恨只恐君王念未蘇

五虎門

西遊昔上三瀦峽今見南荒五虎門勢接天關并地軸
氣吞唯伏與雄蹲八閩津要難耽視百粵山河總大藩
千載卧龍今復起只憑三顧靖中原

次古山下時儒學提舉陳景忠來迓也

不見溪頭荔子丹尚餘碧葉滿空山水流百折成巴峽
山列圍屏擁畫闌粳稻滿田冬不刈漁翁舉釣晚猶安
閩州自古多無恙不許癡兒睥睨看

題劉中守小景

雨後看山更愛山結茅臨水閱人寰交談終日頻傷往
留客烹泉不許還涼月滿空邀鶴住綠陰繞舍聽猿閒
道人又有休官意每憶秋風放白鷗

奉同二次來韻并寄閩省謁諸幕謁閩王廟之作

通呈景容郎中伯益侍郎秘監先生同發一笑

重叨天遣八年餘又辱分符不暫居那有古人秦御史
豈無先輩貢尚書文章官樣誰將並氣節天然我未如
歸到朝廷當下問定從江海詔安車

舟中聽雨

鴈蕩山前船夜灣雨聲蓬外響潺潺半生萍梗何時定
萬里冥鴻與夢還南海有珠輸上國自議必往往泉州
希輸上意蓋

在此處也江東無警報杉關近有人傳建寧官兵已
復邵武江西賊人已過

杉關衛發二
路復奉正朔

五更賦看潮生後覩見祥風起舵間

至正辛丑詔加福建國王為

闕 本省官屬

以正月初九為王誕日謁廟稱賀走叨先行展敬
禮道中欣逢儀仗之過馬上有作戲呈幕府諸公
綠髮紅顏衆省郎漫隨官長謁閩王禡茶羅傘驅前導
皮刺繩床仗後將舉奠杯搖紅蠟炬捧宣人出紫泥香
低頭再拜齊稱賀回首熙熙樂未央

和貢先生韻時同尚書祭亡友李仲容也

故友墳前草不春高風臺上聚星辰翰林小記如冠冕
閣老遺書絕後塵自愧不才難接武多君高誼許為隣
會須相伴朝京闕更有秦郎最可親

簡秦景容郎中昨日承歌談笑適詩酒相忘有放
浪形骸之意以謂到闕以來無此一樂但傷足下
以特達之材坎坷仕路走也辱為知已之游不能
拔而出之此安足為故人耶詩以誌懷聊伸雅嘆
海嶠相逢情更親共看白首惜青春君心寂寞憐知己

我日淒涼念故人談笑總能推兩晉論文還許倡先秦
生平自謂同心膂爭及當時管鮑隣

再和貢先生韻

自是閩荒易得春鳥啼花落惜佳辰三山燈火星連簇
千尺繚絲晚星塵南海珊瑚將北闕東家蝴蝶過西隣
太平好伴還鄉去兒有平安報老親

題臨川曾仲衍手卷時仲衍授永嘉之平陽州同
知有旨命賚御酒宣慰本州周宗道僉院貢米入

京卷有危太樸參政所書虞學士邵菴送行序并
詩三首走亦不揆效顰于左薰簡君道使君
海角相逢如未識三山聽詔見凌嶒大參書法追王獻
學士詩章似杜陵棣萼春明華艷艷芙蓉秋水玉承承
故朝丞相多英裔只有臨川世姓曾

九重選使勞將軍多羨將軍類古人報國只知君父重
與民還侶弟兄親中流砥柱頽波障舊蠟黃封御賜新
君到平陽煩問訊魚緘曾寄涮江鱗

問李則平憲副乞花

明府庭前花數本
汀蘭岸芷迭芬芳
山茶雨過紅婆淨
茉莉風牽粉翅香
隔戶蜻蜓空寂寂
遠欄蝴蝶故忙忙
相逢盡道東風好
一線何曾到晚郎

題江西老人李頤齊手卷

閩海相逢一老翁
布袍藍縷鬢毛蓬
問渠何事蕭條甚
似爾從前寂寞窮
酒後尚能稱草聖
愁來只用指書空
如今江右猶烽火
未許平安附便鴻

甲午歲以公差過江陵之右有訪故人田典簿仲

玉五詩纔
記一也

自昔乘閒訪博聞書樓鐘鼓徹彤雲天吳紫鳳耽成癖
翠柏蒼松喜欲羣有酒便須呼阮籍洛蘭還擬見湘君
椒宮罷直歸來晚刻燭題詩到夜分

題馬生溪山小景

馬生遺我溪山景我笑從前好卜居地僻結茅依澗宿
水深移棹隔溪漁月滿船頭春載酒香生竹裏夜分蔬

室中切莫悲婺婦橫笛于今怨有餘

乙未歲過歸州擬謁宋玉祠不果

聞子愁秋老更悲近來華髮也相催斯文一去無今古
過客千年許往來大雅遺音虛夜瑟故山喬木盡塵埃
一杯不到荒祠下腸斷江流幾百迴

甲午歲題江漢王粲樓和達實寥雅蘇韻

大江西下思漫漫憔悴王郎舊倚欄貌虎晝嗥沙草白
轆轤夜轉井梧寒帛書善託雲中鴈錦字羞題夢裏鸞

魏國山河劉社稷可憐無地望長安

過涪州寄同年董節判碩通

大科賢士涪州判素節清風滿畫川
欵段總隨沙草瘦甘棠只許後人傳
往時同忝三場約為子今留萬里船
但使姓名通帳下敢勞騎馬到江邊

春日陪譙道山亭口占

二月春明花乍殘道山亭上翠如鬟天開圖畫峯攢戟
地接蓬萊雪滿闕雙鳳巢雲朝貝闕六鰲駕海出人寰

薇垣官從多時彥聽取山人半日閒

題米元暉山水為賈仙院判作

雲樹蒼蒼路渺然紫烟綠霧障晴川風間理釣滄江上
日暮移舟野水邊林外有山常近枕澗前無竇獨成眠
生平此願行將遂便擬煩君借一塵

為鄂省檢校陳用方題顧定之墨竹

鳳凰枝上舞鼈轡恍似湘南與渭南紫籜穿林龍乍躍
琅玕着雨翠如酣風前遙影頻搖萬月下開樽偶共三

最憶漢濱千畝地碧波江漲水接藍

為永嘉林溫伯恭題瑞榴圖

安石榴花開滿枝五房同蒂總稀奇永嘉玉樹臨春秀
博望仙葩帶月移勝日名園期共賞他時駟馬兆先知
董林陰德宜多種留取君家百世思

題鄭靜思莊谷叟卷

最愛南華一老仙漆園為吏幾何年人從谷叟庄頭覓
榻向南州去後懸物外靜觀惟我得世間塵鞅欲誰牽

相逢莫賦商巖曲山雨衝寒好放船

題曉意圖

三星欲落不落際流水野橋人度遲鴈影遠含秋影薄
山光爭似曙光奇荒郊犬吠人家僻近塢烟炊筍蕨宜
欲掃柴門迎曉日偶逢花下有朝葵

題連江曾氏墓誌

貢文
齊文

夔山原下半山墳共說曾家子又孫海微衣冠仍見古
荒郊鄒魯自成村秘書文字連城重此日羹牆萬感存

我欲題詩遺不朽錦囊收拾去朝元

題秀才魯環元瑞北門小隱

欲向山中學草玄北門小逕曲通泉讀書燈晃鳥啼夜
把釣船開月滿天行酒賦詩來好客據鞍敲竹引游鞭
誰能一伴幽人宿日鼓南風聽五弦

贈江西憲從事葉彥周

橐生抱牘來相謁珠玉輝煌滿卷中烏府風清飄玉樹
繡衣春煖試青騮馳聲江右催鸞檄奏最燕臺醉鳥酮

君有華居客我惜傷情無柰嘆飛蓬

醉題歌扇

名臺雲

珠玉相輝照席珍一時傾寫任天真雲間駿骨行千里
宇內才名有幾人寰海魚龍須變化菁莪雨露盡陶鈎
小園池館都堪樂句健人豪酒亦醇

陸有嘉羞水有珍相忘聊復遂吾真開樽論議超凡壤
舉目闢河盡遠人力可萬牛支九鼎誰能一線引千鈞
謗才自愧無分補賴有丹衷似酒醇

宴道山亭復風雨有感作

閩川又復過清明花信風牽倍感情四海再逢虞舜日
三年兩駐越王城春光寂寂啼山鳥雲影悠悠拂羽旌
可是東君不相下狂飈吹雨濺銀箏

胄監羣英雅集為相特穆爾君壽題

鳳麟龍虎萃成均雨露菁莪總化鈞天上衣冠星錯落
眼前文物玉嶙峋力扶宗社誰將任手握經綸我敢論
南服海天繞一角行期引領拜楓宸

題仙人磐石吹簫圖

長松樹底坐吹簫，疑是仙人王子喬。
白露未溥涼月上，秋風初弄羽衣飄。
山靈報罷雲朝散，海鶴啼時龍夜朝。
便欲乘鸞覲天上，翩翩孤影屬清標。

題成趣軒

為照磨托爾留題成趣軒。照磨字明善，蓋吾從事也。因書以為勉。

小小蔬園半畝畦，涉能成趣路成蹊。
呼兒灌漑汲石井，留客待烹啼竹鷄。
子荆居室稱苟美，管寧鋤金恒不迷。
華構相承期勿墜，今人應與古人齊。

題黃山鄭潛彥昭練溪漁隱

黃山山下練溪肥水薦溪毛陸薦薇白魚供饌酒初熟
畫舫移來人乍歸治家只是春蚕起結屋更愛山重圍
我欲過從訪漁隱時危常恨與心違

題榴橘聯芳圖

石榴枝上橘來棲佳氣熏春草樹知兩瑞聯芳須未艾
雙岐並秀偶相宜寶垂玳瑁筵初秩葉薦黃金品更奇
蘭玉胥承親尚健定知有喜集門楣

游雲門寺

故宋鄭參
政委大院

洋嶼江頭雲門寺黃緣石磴上青天鄭家祠堂如一日
梵王宮殿經千年鯨音發響嘯山鬼荔子磨丹供別筵
政恐蒼生渴霖雨漫將詩句破蠻烟

伯英右轄餞予於長樂雲門港因其念母贈之以詩
母子相依四十秋母年八十子恒憂劬勞未報當生別
罔極逾深重自尤刺血寫經天亦痛銜哀陳陛孰為謀
君王若問臣消息瘴海蠻烟日夜浮

題不繫舟漁者卷

有序

平陽陳君子上登甲午進士第秉志剛介獨立
不阿初授慶元錄事在任未竟值淛東西盜斂
蠭起郡邑無大小皆陷于賊士大夫苟得脫於
難者往往去依方鎮不顧道義夤緣苟祿以養
生寧舍朝廷弗顧若是者奚啻肩相摩足相軋
哉子上獨不可曰始予承聖天子策士時幸以
子大夫遇我我何忍一旦悖此狐媚以求活耶

乃即日解官還家而慶元亦尋以陷其見幾明
立志勇如此遂號之曰不繫舟漁者蓋卑以自
牧謙以自勵也嗚呼舟惟不自繫然後得往來
江海間以自適人惟不自繫則彼之所謂富貴
者入焉得而誘我免我繫而縛之若犬羊然哉
走也適以督運事嚴泊舟于此偶得與子上邂
逅於是嘉其高而贈之

舟惟不繫任浮游之子襄心適與侔一身不近龍蛇穴

萬慮無如煙水謀那待月明纔舉網只須風定便行舟
闕

七言絕句

柬秦景容郎中昨晚閱高文誦之亹亹不倦沈著類
子厚而不失之晦痛快似退之而不失之浮恢恢乎
與韓逼真而於柳有所不屑也予識景容十五年頗
謂相知今殆不如遠矣斂衽再三賦詩為謝

錦綵裁來五色絲千方製就欲誰衣自慚輸與天孫巧

凡女從今不下機

題劉中守僉憲為閩海憲史馬謙叔賦二首

經年不見劉郎畫山色溪光共可人底事往來滄海客

釣舟容易許相親

遠山迢遞近山高茅屋溪聲閑潤毛江浦潮來帆正疾
日邊歸客頓相遭

松林午憩

松林坐久午風清溪水潺潺樹有聲何處小舟撐柳外

來迎潮落去潮生

渡口

海淀風輕晚待潮首綿車響客心搖人家住近青松渡
小女當簷弄阿嬌

孤鶩飛來數點青映山紅葉笑相迎青裙赤腳誰家婦
閑背牙梳也自榮

紀見

榕樹根垂荔葉齊遠簷宿霧綠初迷鷓鴣啼徹山頭雨

午夢醒時日正西

正月

閏荒正月似初秋終夜聞雷耳畔遊睡覺渾如到家日
欲從庭下認牽牛

題集賢都事石林

二首

琪樹亭亭廣萬章屹無枝葉蔽嚴霜相逢請看中流柱
未必凌層似爾長

誰為明堂作棟梁石林屹立並雲長會從白玉樓中見

杞梓何能與鴈行

寄貢泰父先生解紛詩書扇

霸業爭驅孰後先
葵丘一會更無前
如今誰是排紛者
那有先生似仲連

題鄭靜思小像

月明山靜海無塵
鶴筆翩躚玉一痕
却記別時春已暮
落花都付富家村

為江混宣使題補之墨梅 二首

羅浮山下梅梢月素質湘裙淺淺粧昨夜嫦娥初出浴
桂華不敢妬清香

螺女江頭春色多孤根分瑞到南坡當時丰度今猶在
清苦如君少奈何

附錄

元翰林承旨楚國李公壙志

公諱士瞻字彥聞世居河南荆門曾祖諱之敬贈荆湖
北道宣慰使都元帥祖諱文亮贈太常禮儀院使俱追

封楚郡公父諱壽椿贈河南行中書省平章政事追封
楚國公曾祖妣陳氏祖妣張氏俱追封楚郡夫人妣鄭
氏追封楚國夫人公幼英敏好學應度支卿柳嘉辟為
知印非其志也嘗中大都路進士第為萬億廣源知事
中書舉為掾歷刑部主事陞員外郎樞密院經歷出僉
山南憲入為吏部侍郎遷戶部行永平總管府事陞本
部尚書出督福建海漕以功就拜福建行中書左丞召
入參議中書事進參知政事一年入翰林為學士階陞

榮祿大夫遷遼陽行中書左丞再入為中書參政改樞
密副使拜翰林學士承旨進封楚國公公生皇慶二年
二月一日至正二十七年十一月二十七日以疾終於
京師明照里第之正寢春秋五十有五十二月三日葬
大興縣臘八之原娶何氏武畧將軍提舉何解之女封
楚國夫人子男四人守成守恒守峴守岷守成登進士
第戶部司計官守恒遼陽等處行樞密院斷事府經歷
守峴太尉府掾守岷國子生孫男一人尚幼孤子守成

等泣血謹志

榮祿大夫太常禮儀院使陳祖仁填諱

翰林學士承旨榮祿大夫知制誥兼修國史王時題蓋

翰林承旨楚國李公行狀

公諱士瞻字彥聞南陽之新野人後徙漢上曾祖諱之敬累贈荆湖北道宣慰使追封楚郡伯配張氏累贈中奉大夫太常禮儀院使追封楚郡公配張氏累贈楚郡夫人父諱壽椿字春伯累贈榮祿大夫河南省平章政

事追封楚國公配鄭氏累贈楚國夫人至正初公以布
衣遊公卿間平章烏蘭哈達左丞烏克遜良楨嘗以王
佐許之尋用度支監卿柳嘉薦為知印非其志也舊制
凡大都有恒產住經年深者聽就試年三十餘中大都
路進士第十名庚寅歲也知印歷十九月考滿任將仕
郎萬億廣源庫知事歷二十四月中書辟充右司掾時
濟寧有警朝廷分省院以鎮之城陷省臣奏兩府官處
死上以知院哈喇巴圖爾勲戚赦之以右丞阿克塔齊參

政賈惟貞等坐之公上書曰知院職在總兵宜處以重
刑省官職在供給止宜定為杖流今知院雖特勅免死
不過聖恩少延其生耳書奏右丞等遂得減死在掾七
月除從仕郎刑部主事出贊總戎時兵犯左衛京師震
恐裨將劉哈喇布哈兵甫交其母凶問至京上遣使即
軍中慰弔公曰今兵勢方振遽宣詔旨彼將哀毀不暇
大敵在前其孰足以禦之若能少緩信宿事方兩全從
之明日兵果大捷由是京師無虞蓋其籌畫之力也未

幾遷承事郎樞密院經歷調僉山南江北道改儒林郎
吏部侍郎遷文林郎戶部侍郎行永平路總管陞戶部
尚書散官如故出使閩省時海酋賽富鼎為帥日肆暴
橫公斥責之其黨抽刃環立語益厲酋嚴憚焉既而有
旨命揚珠布哈為平章首拒之平章徵兵攻城凡三月
民乞救公出謂平章宜宥此曹去從之公欲復入平章
謂入將見留公曰民候我去留為存亡不去且有變平
章強留之首果疑失策復謀出襲及再入事遂定藩屏


以安閩人為建祠樹碑詔拜資善大夫本省左丞尋入
為中書參議丞相綽斯戢議解博囉特穆爾兵炳公曰
削權事重宜先調兵以固關輔丞相以有備給之及博
犯闕丞相敗詔以伊蘇為相公為參政陞資政大夫公
謂相曰彼凶悖首禍天子以丞相代之功當百倍疇昔
如其復蹈往轍安知無前日之禍耶乃上疏其畧曰竊
觀今日國家之勢有淹淹將盡之氣無赫赫再振之威
有甘心就亡之意無救焚拯溺之志又謂宜亟下明詔

以彰天討疏上不報遷翰林學士榮祿大夫知制誥同
脩國史知經筵事博囉入朝出為遼陽省左丞至則傳
檄遠邇其畧曰違積世之先勲名曰逆子犯無君之大
惡號為賊臣仍拘執來使以釋羣疑獎勵諸軍以圖大
舉事平再入為參政時庫克特穆爾南征有詔諸王駙
馬悉聽節制等語公以為權寵太重勢將難制不聽於
是辯論愈切上乃俾詞臣增其詔語曰以南諸王駙馬
云云又嘗言諸朝曰今國家一新政理宜先正綱常執

政有謂國俗叔嫂相嫁娶蓋欲保其家產者公正色曰廟堂之上議論綱常乃以家產為言乎其人慙而止尋改樞密副使時庫與張思道等仇殺遣使乞詔以討之人莫敢言公曰棄南征之命而與王師敵咎誰歸况當其出師也既付以便宜之詔令復有何詔乎若遂與之則是責在朝廷矣事遂寢後復上疏曰今造作不已恐傷民力傳之遠邇有鉞兒鼓兒之戲播之京師有斧兒鑿兒之謠而陛下不之寤臣恐大事一去雖享有宮室

之樂其可得耶上嘉之拜翰林學士承旨知制誥兼脩國史進封楚國公未幾以病卒時至正二十七年冬十一月也年五十五配何氏累封楚國夫人子男四人長守成後名延興登丁酉王宗嗣榜第三甲進士次守恒遼陽行樞密斷事官經歷次守峴太尉掾史次守岷國子生員公平生襟度開夷識趣弘遠忠義之節炳如星日塞謗之風凜如冰霜而經濟之才浩如江海使當時能委任而責成之其相業又曷可量耶

榮祿大夫太常禮儀院使陳祖仁撰



經濟文集卷六